
乾坤鑿度·乾鑿度

庖犧氏先文

公孫軒轅氏演古籀文

蒼頡脩為上下二篇

黃帝曰。太古百皇。闢基文籀。遽理微萌。始有能氏。知生化柢。晤茲天心。謔念虞思慷慨。慮萬源無成。既然物出。始俾太易者也。太易始著。太極成。太極成。乾坤行。老神氏曰。性無生。生復體。天性情。地曲巧。未盡大道。各不知其自性。乾坤既行。太極大成。黃帝曰。聖人索顛作天。索易以地。俯仰而象。遠近而物。浩而功。然而立。太古斷元。聖人法地。極先生而設位。物成而麗諸形。錯煇以文。改茹以魚。虞獸以韋。上齒以壽。法物以授。析莠以策。運蓍以數。王天下者也。太易變。教民不倦。太初而後有太始。太始而後有太素。有形始於弗形。有法始於弗法。極先元見。軌轍像儼。章流立文。以詰息孫。而後傳授天老氏。而後傳授於混沌氏。而後授天英氏。而後傳無懷氏。而後傳授中孫炎帝神農氏。中聖古法淳物。元造不足。益之器用。農穀衣蠶。高以飾乘。卑以飾足。而後傳烈山氏。而後授三孫帝釐厘氏。次授老孫氏。公孫軒轅氏益之法。神器車符。文左武右。三器備御。自上古及下帝孫。大熟化演。設民弗倦。益物弗限。盡秘先之旨闕。接引聖人。顯其機智。聖人曰。乾坤對。太易興。設法軌。壞而息。智之易。八卦變策。象數庶物。老天地限以為則。庖氏先文乾鑿度。勅天門以為名。古有先文。未析真冥。

太古文目

先元皇介。而後有垂皇策。而後有萬形經。而後有乾文緯。而後有乾鑿度。而後有考靈經。而後有制靈圖。而後有河圖八文。而後有希夷名。而後有含文嘉。而後有稽命圖。而後有墳文。而後有八文。而後有元命包。一十四文大行。帝用垂皇策。與乾文緯。乾坤二鑿度。此三文說易者也。元皇分【按。即前元皇介】。雖測問險隴。術行大旨也。乾鑿度。聖人頤乾道浩大。以天門為名也。乾者天也。川也。先也。川者倚豎天者也。乾者乾天也。又天也。乾。先也。乾。訓健。壯健不息。日行一度。鑿者。開也。聖人開作。度者。度路。又道聖人鑿開天路。顯彰化源。大天氏云。一大之物目天。一塊之物目地。一炁之靈名混沌。一氣分萬翮。是上聖鑿破虛無。斷氣為二。緣物成三。天地之道不漂。黃帝曰。觀上古聖。驅駟元化。劈楛萬業。徒得為懋。訓究體譯。元肇頤浚澳作沐。懸心輪薄不息。以啟三光。上飛籥風雨。下穴滂河沱。得元氣。澄陰陽。正易大行。萬彙生。

上古變文為字。變氣為易。畫卦為象。象成設位。

古文八卦

☰ 古文天字。今為乾卦。重。聖人重三而成。立位得上下人倫。王道備矣。亦川字。覆萬物。

☷ 古僇。地字。軒于乾。古聖人以為坤卦。此文本於坤鑿度。錄。後人益之。對乾位也。

☴ 古風字。今巽卦。風散萬物。天地氣脈不通。由風行之。逐形入也。風無所不入。

☶ 古山字。外陽內陰。聖人以山含元氣。積陽之氣成石。可感天。雨降石潤。然山澤通元氣。

☵ 古坎字。水情內剛外柔。性下不上。恒附於氣也。大理在天潢篇。

☲ 古火字。為離。內弱外剛。外威內暗。性上不下。聖人知炎光不入於地。

☳ 古雷字。今為震。動。雷之聲形。能鼓萬物。息者起之。閉者啟之

☱ 古澤字。今之兌。兌澤萬物不有拒。上虛下實理之澤。萬物象斷。流曰澤。

昔者庖犧聖人見萬象弗分。卦象位虧。益之以三倍。得內有形而外有物。內為體外為事。八八推蕩。運造縱橫。求索覓源。尋頤究性。而然後成。

大象八

天乾。地坤。日離。月坎。風巽。雷震。山艮。澤兌。

立乾坤巽艮四門

乾為天門。聖人畫乾為天門。萬靈朝會眾生成。其勢高遠。重。三三而九。九為陽德之數。亦為天德。天德兼坤數之成也。成而後有九。萬形經曰。天門闢。元氣易。始於乾也。

坤為人門。畫坤為人門。萬物蠢然。俱受蔭育。象以準此坤能。德厚迷遠。含和

萬靈。資育人倫。人之法用。萬門起於地利。故曰人門。其德廣厚。迷體無首。故名無疆。數生而六。六者純陰。懷剛殺德。配在天。坤形無德。下從其上。故曰順承者也。

巽為風門。亦為地戶。聖人曰。乾坤成氣。風行天地。運動由風氣成也。上陽下陰。順體入也。能入萬物。成萬物。扶天地。生散萬物。風以性者。聖人居天地之間。性稟陰陽之道。風為性體。因風正聖人性焉。萬形經曰。二陽一陰。無形道也。風之發洩。由地出處。故曰地戶。戶者牖戶。通天地之元氣。天地不通。萬物不蕃。

艮為鬼冥門。上聖曰。一陽二陰。物之生於冥昧。氣之起於幽蔽。地形經曰。山者艮也。地土之餘。積陽成體。石亦通氣。萬靈所止。起於冥門。言鬼。其歸也。眾物歸於艮。艮者止也。止宿諸物。大齊而出。出後至於呂申。艮靜如冥暗。不顯其路。故曰鬼門。

庖犧氏畫四象。立四隅。以定羣物。發生門而後立四正。四正者。定氣一。日日出沒二。陰陽交爭三。天地德正四。

立坎離震兌四正

月坎也。水魄。聖人畫之。二陰一陽。內剛外弱。坎者水。天地脈。周流無息。坎不平。月水滿而圓。水傾而昃。坎之缺也。月者闕。水道。聖人究得源脈。洌涉淪漣。上下無息。在上曰漢。在下曰脈。潮為澮隨。氣曰濡。陰陽礪礪為雨也。月陰精。水為天地信。順氣而潮。潮者水氣來往。行險而不失其信者也。

日離。火宮。正中而明。二陽一陰。虛內實外。明天地之目。萬形經曰。太陽順四方之氣。古聖曰。燭龍行東時肅清。行西時暝曠。行南時大暉。行北時嚴殺。順太陽實元。暖燠萬物。形以鳥離。燭龍四方。萬物嚮明。承惠煦德。實而遲重。聖人則象。月即輕疾。日則凝重。天地之理然也。

雷木震。日月出入門者。日出震。月入於震。震為四正德。形鼓萬物不息。聖人畫之。二陰一陽。不見其體。假自然之氣。順風而行。成勢作烈。盡時而息。天氣不和。震能飜息。萬物不長。震能鼓養。萬形經曰。雷。天地之性情也。情性之理自然。萬形經論【按。或衍或缺】。

澤金水兌。日月往來門。月出澤。日入於澤。四正之體。氣正元體。聖人畫之。二陽一陰。重。上虛下實。萬物燥。澤可及。天地怒。澤能悅。萬形惡。澤能美。應天順人。承順天者。不違拒。應人者。澤滋萬業。以帝王法之。故曰。澤潤天地之和氣然也。

聖人索象畫卦

配身。取象。裁形。取物。法天地宜。分上下屬。

配身。乾為頭首。坤為胃腹。兌口。離目。艮手。震足。

取象法用。養身法頤。匹配法咸。造器設益。聚民以萃。

裁形變文。順天文為賁。設人文夬。參鳥文離。象獸文革。

取物制度。親疎噬嗑。御難設豫。服牛馬隨。物敗以剝。

法天地宜。鼎象以器。苑閣法觀。天市噬嗑。文昌六局夬。羽林法師。法漸地利。室法家人。法定主屯。

分上下屬。聖人畫卦。制度則象。取物配形。合天地之宜。索三女三男六十四象。以上下分之。陽三陰四。法上下分位。

聖人設卦。以用蓍生。聖人度以虛實。英草與天齊休。萬形經曰。蓍生地于殷。凋殞一千歲。一百歲方生四十九莖。足承天地數。五百歲形漸幹實。七百歲無枝葉也。九百歲色紫如鐵色。一千歲上有紫氣。下有靈龍神龜伏於下。軒轅本經云。紫蓍之下。五龍十朋伏隱。天生靈莢。聖人採之。而用四十九。運天地之數。萬源由也。

象成數三【生】

易起無。從無入有。有理若形。形及於變而象。象而後數。易名有四義。本日月相銜。又易者。又易。易定。蒼牙靈。昌有成。孔演明經。聖人鑿開虛無。畎流大道。萬彙滋溢。陰陽成數。

天數

一。九。二十五。三萬九千七百五十五。

地數

二。六。三十。八萬六千四百二十。

卦數

三千八【六】百四。又位大二十二萬八千二十四卦數。

爻數

三百八十四。通二萬二千八百二十四。

衍天地合和數

天地合一二得三。合九六。合二十五及三十。

乾策二百一十六

一策三十六。策滿六千九百一十二。

坤策一百四十四

一策二十四。策滿四千六百八。

八策

萬一千五百二十。

日力月力

日八百四千八萬八千九百七十六分。月一千五百八十七萬九千八百八十四小分。

八象大盡數

二百二十八萬二千四百。九百八十七分。

生天數

天本一而立。一為數源。地配生六。成天地之數。合而成性。天三地八。天七地二。天五地十。天九地四。運五行。先水次木。生火。次土及金。木仁火禮土信。水智金義。又萬名經曰。水土兼智信。木火兼仁惠。五事天性。訓成人倫。

天地合策數五十五

所用法古四十九。六而不用。驅之六虛。

著

四營十八策。多少兼云。而成其位。天造聖智。垂訓神謀。及爾子孫。教授不墜者焉。

古文略

□。僇。庀。籀。宀。隄隰。怕。漂。駟。討。緇。

惣釋二十九卦數例

屯。十年乃字。需。三人。訟。戶三百。三禡。師。三錫。比。三驅。同人。三歲高陵。蠱。三日甲。臨。八月。復。七日。又十年。剝。頤。十年。坎。簋二。三歲。【按。有闕文】晉。三接。明夷。三日不食。睽。二女。一車。解。三狐。損。二簋。三人。一人。十朋。益。十朋。夬。五剛。萃。一握。困。三歲。革。三就。震。遂七日。漸。三歲。豐。三歲。旅。一矢。巽。三日。三品。既濟。三年。未濟。三年。

乾坤鑿度・坤鑿度

庖犧氏先文

公孫軒轅氏演籀

蒼頡修為下文

坤鑿度者。太古變乾之後。次鑿坤度。聖人法象。知元氣隕委。固甲作捍顛。孕靈坤僿。聖人斷元。偶然成地。積土形。不騫崩。太極有。地極成。人極靈。如履薄厚。如資長極。天有太極。地有太壇。黃帝曰。天地宜盡闔。地道距水澈。女媧斷定足。其隕一址。坤母運軸。而後大央氏。百庭氏。大元氏立坤元。成萬物。度推其理。釋譯坤性。生育百靈。效法之道矣。

坤元十性

坤為人門。坤德厚。坤有勢。坤多利。坤元有信易平。坤道平易。坤有大策。坤純陰正。坤法為人腹。坤道有閉。希夷名曰。元有德十。其形名八。

坤有八色

東下西上。北黑南輕。中殷甘滋。厥土厚肌。東鹹西淡。南污北荒。

坤屬

一離火。二巽風。三兌金。

火為坤母。巽為離父。金乃坤孫。以坤為聖人則之象也。

坤性體

一刑殺。二默塞。三沉厚。

一刑者。陰體好殺。刑罰如此。默者充靜。充塞不動。沉者勢不自舉。體沉也。

坤有變化

一虛。二簡順。三潔凝。

庖犧氏畫坤卦。有四象變理。和蕩為美。凌蕩為惡。雜配不和。德匹成正。互體反交。形體不同。

一惠位。正。坤來山附。地兼山謙。

二復反本。天地否。地天泰。

三蕩配。火下有地晉。地下有火明夷。

四凌配。山存地剝。

八卦坤道聖人釋動植之源

制靈經曰。天有九道。坤有四道。易有二道。坤四運者。上冥運。

冥運道

上冥運。物性包蔽。不顯其源。出處不知。潛隱罔差忒。

象道

制靈經曰。假恐。訓至也。古文無解。生曰象。又假生曰寓。化象物邪。象正體元。

氣化元

老氏曰。坤氣不和。物出不遂。氣滯終沮。氣滿終氣。化不永。坤之元體存。氣化存。存元氣。

物成坤化

坤道成。坤大駟。上發乃應。庖氏曰。坤駟於乾。順。亨貞。駟依乾而行。乾一索而男。坤一索而女。依乾行道。乾為龍。純顯氣。氣若龍。坤為馬。

乾為父。坤為母。皆駟順天道。不可違化。乾君坤臣。乾稱德三。坤以奉六。故

成乾九。乾二十五。坤輶三十。乾位爻六。坤承奉六。右乾覆坤。乾元三。含兩坤。乾大策。含坤小策。大含小。下輶上。聖人裁以天地。膊輶而養萬元。正其道。

聖人象卦

庖犧氏曰。上山增艮。定風對信。立雷作威。水火成濟。

聖人法物

爭而後訟。和而後解。不通而否。大通而泰。乖而後睽。無懷氏曰。上聖頤天以盡象。頤物以盡源。頤事以盡情。而後天平地成。萬穴効靈。五物栝行。三天不亂。聖與造遊。理俾冥運。易動而敷。運化諸府。乾坤在道。日月相對【將】。天地與訓永常。日月與明。雖未盡大道。各眇彰泊性。明抵示元。蒼生息元【玄】。大化行天地也。

庖氏著乾鑿度上下文。媧皇氏地靈母經。炎帝皇帝有易靈緯。公孫氏。周易。孔子附。仲尼。魯人。生不知易本。偶筮其命得旅。請益于商瞿氏。曰。子有聖智而無位。孔子泣而曰。天也。命也。鳳鳥不來。河無圖至。嗚呼。天命之也。歎訖而後息志停讀。禮止史削。五十究易。作十翼。明也。明易幾教。若曰。終日而作。思之於古聖。頤師於姬昌。法旦。作九問十惡。七正八嘆。上下繫辭。大道。大數。大法。大義。易書中為通聖之問。明者以為聖賢矣。孔子曰。吾以觀之。曰。仁者見為仁幾之文。智者見為智幾之問。聖者見為通神之文。仁者見之為之仁。智者見之為之智。隨仁智也。

漢代舉。舉先易。而後依孔子。

版本信息：安居香山、中村璋八輯《緯書集成》，河北人民出版社，1994年。底本為台灣四部集要本《易緯八種》，1963年。

編者按語：是書有舊注，標為蒼頡所注，《緯書集成》又題鄭康成注，蓋誤，此處省。文中黑魚尾括弧內有編者所加按語及據日本內閣文庫藏明刊本校改的若干文字。此本前有錢唐許當世（彥輔）序，正文標明乃錢塘金宗化（玄度）、楊之森（秀夫）所校。其特點是與《古三墳》合刻為一冊，且第五頁為錯頁。原書頁被《周易乾鑿度》之一頁頂替，蓋同名為《乾鑿度》而被誤植。黃帝降生四千七

百三十一年十一月廿二（西元 2021 年 1 月 5 日）寫定。